



聖宋名賢五百家播芳大全文粹卷百三十九

祭文

焚黃祭考君文

趙德莊

維乾道八年歲次壬辰九月丁卯朔二十九日乙未
男具位某謹以清酌庶羞之奠敢昭告于先考中奉
之靈天下之願欲有富貴者不能致而孤窮之人或
得之世稱仕官曰去墳墓而古人所記以過家上冢
為榮有如某以刺史章守松楸者二年而疊蒙上恩

寵嘉其先得以綸告親奉於神明誠富貴者未必有
而孤兒之幸一時所慕焉者也祇然之政粗寡怨尤
樵牧之虞可以不戒惟是音容益遠埽祭元期哀涕
颯然肝肺俱裂嗚呼尚享

焚黃祭妣親文

維乾道三年歲次丁亥十二月甲午朔初五日戊戌
男具位某謹以清酌庶羞之奠敢昭告于先妣恭人
之靈伏以本朝以孝治天下士有列於朝者慶賜之

行必及其親某數年之間蒙上嘉寵進夫人之號凡
三等而今者靈宮朝成綸告夕至事若合契滌逾過
蒙天子休命不敢留夫人餘善不可揜敬用齊祓告
諸神明其慶其承以佑我後尚享

焚黃祭文

黃泰之

我幼失怙冠而喪母年甫五十遽哭仲子以我哭子
知親之仁我則不孝胡然報親親恩无窮子報有限
今茲霑被曾未尺寸孤窮憂感進德之階庶後厥榮

親其監哉

焚黃祭文

某以不才繆塵仕版閨闈之助繫靈實多乃位于朝式經郊霈追榮之典國有故常盡所以慰人臣追遠念舊之心且俾夫淑德令婦生雖不食邑而終亦不失身後之名也菟兮如在服此寵光

焚黃祭考妣文

汪彥章

嗚呼某獲罪于天不獲終考妣之養又不能躬守墳

墓奉祠春秋日往月來于心哀慕有不勝言者幸銜訓嗣事叨榮于朝每朝廷恩數之頒必推本所自進官遷秩追賁泉扃故自某去松楸十八年間被命書者无慮十數謹擇剛日告于墓前惟我考妣惠顧不忘服天子寵休以垂裕于後

焚黃祭考妣文

孫仲益

某蚤承先訓束髮授書兩踐詞科濫升冊府四備省臺之列五塵儒學之冠寔冒朝榮遂登詞禁躋延華

閣出守便藩惟聖主推曠蕩之恩追本教忠之自而
人子致哀榮之極肆䟽飾壤之封超躡崇階進都顯
號考先承事凡七封而至朝議先妣太孺更三賜而
至令人玃首鸞素朱衣象版丕顯三朝之命光賁九
泉之幽

焚黃祭文

陳無已

故事天子祀享天地同休諸臣施及存歿某年以散
郎竊位于朝與有追榮之典自衛尉少卿卿中大夫

三告于第其所以褒郭氏之意甚寵既藏于家又焚
其副書以追錫於地下則天子孝治之道亦已至矣
顧惟不似何以及此惟是先大夫之餘休遺澤積厚
流長故能生身其祿歿受其報則天之報施善人不
為不至也故敢以告

先考獨善先生祠堂祭文

熊子復

某猥蒙先慶方校石渠之文荐誤上恩更紬金鎖之
史蓋有典謨篇則章堯舜之盛然措春秋辭則非游

夏之能修書屬纂於四朝秉筆詎庸於一介幸斯文
之亦預皆吾父之所貽知幾載國史之言敢舍毫而
弗決子長述先人之享雖流涕以何從

先考奉議祠堂祭文

典冊府之秘藏纔叨序轉攝辭闡之邃直遽冒簡徐
維此誤於上恩蓋寔緣於先慶懷錦溪風月之藏徒
夢繞於祠堂寓鑿坡雲霧之窻阻躬陳於薦豆

堂祭壽光縣君文

汪彥章

某等得罪神明傾奪茲陰燿然孤露駒犢不如日月
有期禮當即遠攀號莫及靡潰肺肝不滅生以死為
殉忍羞甘旨如奉晨昏瀝血呼天冤訴何所

遷葬祖母祭文

趙德莊

嗚呼盛衰之理其不可常哉其可悲也哉某尚忍言
之方我太夫人之康寧也慈祥之化熙怡恬愉子孫
同年擢第而歸男書女絲內外盈室旨甘滄瀝抱其
曾孫時節出游板輿爭持升堂上壽賜觴累十自意

平生每當如此曾不知其樂也及其衰也太夫人不待耄而化父僅免喪賫志以歿壯者少者相繼淪亡十年之間零落殆盡于是生有不能養而死有不得葬者矣尚其幸者太夫人親享其盛之樂而不知其衰之悲也邈焉佛廬非神所安祭拜掃除不具而缺歲時霜露肺肝如焚盖又十年而後某遭時簡拔稍建門戶諸生官學粗有成立克襄大事于今茲山川清華有桂有松靈車孔安姻族畢至而某蒙上哀眷實持使者之節以來行路咨嗟且弔且慶庶幾乎曩者之盛矣神靈在上喜耶悲耶顧我諸孤弗復思耶冥冥終古逝若斯耶嗚呼哀哉尚享

遷葬母祭文

嗚呼諸孤不孝早失母慈時方亂餘父仕不耦江城蕭瑟旋踵去之兒雖稚童寧不知痛日夜望父壽考顯融十有三年荐罹大故父素清峻兒官又卑弟呼妹號墮彼閩嶠墓雖兒事力惟它人西望母喪不敢

言祔飲此沉恨天地有窮惟禍之延譬彼烈火死威
莫救生窮无歸廩廩十年神怒始怠嫁娶官學稍生
人兒宰是邦與民相樂退而可老乃營母宮逮茲告
遷兒亦白首阿申自力始終服勞諸孤四方不能咸
集兒獨最幸蒙上哀憐載以輶車歸為母寵親郊之
慶父升卿班母貴如之綸告鼎至積善之報匪我後
人惟兒弟兄視母如在或仕或處實為一家護持松
楸罔敢怠失母也安止寧知兒孤嗚呼哀哉尚饗

省墓祭文

張欽夫

某往者惟念古不墓祭之義每來展省號哭于前不
敢用世俗之禮以行其所不安而其中心終有所未
滿者近讀周官有祭於墓為尸之文乃始悚然深惟
先王之意存世俗之禮所以緣人情之不忍而立尸
以身所以明鬼神之義蓋其處之者精矣是用今茲
敬躋此義為位于亭具酒殽之薦以寫其追慕之誠
惟事之始不敢不告俛伏流涕不如所云考妣之神

實鑒臨之

家廟祭文

熊子復

不患莫知可雖求于自己必有餘慶善益積於吾家
伏念某五上纜忝於儒科再轉猥塵於師職竭來潤
浦統在浙畿既踰兩考之書遂獲六章之薦固上官
之垂憫實先世之蒙休然而歲則尤賒事亦多變惟
益圖於黽勉更默藉於獲持俾及代期不虧負數庶
脫選坑之冗亦階仕路之榮

祭遠祖顯靈英濟王文

汪彥章

嗚呼隋失厥馭中原沸騰擾擾名字群雄競稱王起
閭里幾同販繒有地千里一方所憑聞真主出矍如
履冰適藉疆土輔唐以興屢錫褒詔人知勸懲旣歿
牖下咸思奉承廟食故壤左淵右陵歷記五百石王
始薨逮入吾宋神光愈明請雨請霽信而有徵乃
王爵彛章並升燕及後裔日蕃歲增散處諸邑非雲
則仍間顯于世如膏續燈小子何幸守符是膺身則

寵矣懼材弗勝日賴陰相宜其股肱欲走詞下拘繫
莫能爰薦菲薄實之豆登用告來者毋忘禴烝尚享

祭先考辭堂文

嚴仲仁

士孰不知學學而儒雅足以飾吏乃士之賢吏孰不
為政政而剛明足以去惡乃吏之先茲二者難乎一
舉而兩得得之矣又孰見其雖老而彌堅惟公醉飽
六經網羅百氏胸中之所停蓄浩乎江河之巨浸文
焰之所暴燿爛如星日之高懸若其偉望推美乎當

代懿行儼蹤乎古人庠校願得以為友奮乎百世之
下克生孔孟之與淵騫奈何徒資之以如此之德且
賦之以如此之才而不使折桂林之一枝搏鵬程之
九萬誰為此者蓋乎莫致之命莫為之天而仕猶足
以行其志功猶足以及其民祿猶足以明其親而令
聞廣譽遂與卓茂魯恭並流无窮者乃公平昔所蘊
之万一獨有為於耆艾之年至于猷簪紱之儻來樂
溪山之勝賞養恬少室於意松茲一觴一詠懽無虛

日人皆謂公為山中宰相閭苑神仙善既積夫厥躬
壽雖富而合延奄玉樓之落成亟鶴馭之言旋雖芳
蘭乍凋一時以為恨而高風不泯萬古以猶傳愴哀
思之罔極念欲報以茫然爰卜吉於崇岡庶安止於
新阡清飈吹林素月滿川溪光起而相蕩烟色散而
爭妍公生則愛此今死寧捨旃靈車在途總帳云遷
望佳辰而永訣空隕涕而漣漣聊寓辭于一奠公來
歆其吉蠲嗚呼哀哉伏惟尚享

過房子祭所生母文

淵生珠齊矜其明燦燦乎令淵之靈崑生玉趙貴其
珍溫溫乎全崑之神嗚呼丹山之鳳棲乎高梧寤寐
丹山莫涯歸歟陽穴之嗣嗚于通衢瞻戀陽穴徒切
依於嗚呼日月並明宿靄掩翳蟾兔失精岵此長陟
烈火震蕩草木落魄嗚呼卧冰舞綵心已有歸輟社
護雷志冒忍違

祭叔父給事文

黃魯直

嗚呼叔父忠信足以感欺匿和裕足以諧怨爭行不
祈報之施為不近名之清孝悌達於草木勤勞載於
朝廷謂當朝夕三事光輝九族白首庇民百僚是式
黃扉青瑣曾不期月如何昊天殲奪斯亟嗚呼哀哉
在昔叔父典獄宣城牧民會昌恐一不情視之如傷
司農討論御史補察持節賑饑鰥寡受職六年在晉
民可即戎教之信義不奪農功元祐考績民兵蠹政
監觀四方維晉不病使者奪印以謝逋逃維叔父留

中郎民曹是將使節并護隴蜀食荼乘馬夷夏與足
入佐衮司與聞和羹起居柱下日近清明人謂叔父
宜在帝側山龍黼黻潤色衮職二聖材之俾承密旨
有寃楚獄无根受詆叔父拜章極謝罔功亦憂兵食
遂刺闕中日月照臨白珪无考來給中方將耒老陰
德在民民功在邦善士彈冠豈惟我宗嗚呼何負於
神祇忽遽隕越頃在衰削聞訃顛踣荼蓼薰心无淚
續哭今我不天又失叔父彼蒼者我忍此窮露兄弟

之子猶子然有是言叔父附我我乃信然平生拜至
教誨笑色今哭歸船斷旌枯木几筵在堂不聞金玉
之音酌酒不觴落涕墮心嗚呼哀哉

祭十叔父朝請文

熊子復

昔我先君與十叔父未冠而孤家四壁立高平夫人
黑髮滿櫛携持東歸一錢之奉必自己出先君與叔
父躬若服勞晝耕夜讀陋巷簞食人不堪憂啜菽飲
水歡盡其考辛勤十年用立門戶高堂致養祿則逮

親錫爵九卿燕及皇祖子孫秩秩遂為大家兄弟白
首舉酒相對夫豈不懷昔因今遂百韻之詩以苦為
戒時我諸子實預聞之紹聖无祿先君即世我與二
三孤悼心失圖引領瞻望曰惟祖惟父其誰恤予躬
叔父千里啓書泣數行下車不及載匍匐來歸俾我
先君獲從先大夫以安于九原其叔父之力其誰克
尸之我是用銘膺鏤腸不敢失墜莫或未死其猶報
厚恩嗚呼孰謂叔父弃我而先逝乎昔叔父之既告

老也我猶庶幾日終更亟歸以歲為期炮羔酌酒鞠
跽舂鞫起前致詞上千萬壽我見叔父先君存焉天
不悔禍家難重仍仲姑季母如葉墮霜惟獨叔父今
也則亡生不承顏病不嘗藥拊櫬誰慟屬續誰託惟
恩負義生慚死作嗚呼哀哉福清之慈足以撫後嗣
太廟之孝足以紹先烈惟我叔父其何憾焉惟是平
生不耀有德孝悌忠信寔秉金石人或弗識昧莫覺
知是惟子弟之責我不得而敢辭願與諸兄仲叔季

弟收懿美緝比行事將考遠日附之窀穸以燕叔父
之歸則欲報罔極雖不萬一而下見先君庶无愧於
異時也長河洋洋莫不親酌匪酒則多續以涕淚嗚
呼哀哉尚享

祭族叔承議文

汪彥章

嗟惟我公全德自名酬酢萬事一專以誠魏有東郭
唐有魯山千載相望與公為三世人雄夸藻藉琮璧
外雖粲然中滿瑕謫公獨樸茂不為琢雕經書自奮

通班漢朝世人紛爭步設二穿術窮數殫還復相勝
公獨淳至不為巧巖內蒞劇邑豺狼化之文為人師
行為人則凡人所趨無一能惑坐禦浮薄如堤捍川
天胡不留使至百年公於死生視若泡影伊人則憂
風俗誰正吾宗之幸家有德人况蒙公知愛與子均
聞公永歸不克馳送以詞寫哀非公誰慟嗚呼哀哉
尚享

祭南康太守四九兄文

張欽夫

嗚呼同祖兄弟今存四人惟兄能文自于妙齡意期
遠大以翼吾門僅守一州才未克伸豈謂茲朝乃傳
訃音驚惶慟哭痛心原鵠為位一奠哀哉此情嗚呼
哀哉尚享

祭南康太守四九兄文

嗚呼哀哉惟兄早歲秀發而文秦國之恩篤於諸孫
忠獻之愛視子攸均矧惟伯父實艱實瘞未究之業
付之吾兄謂當遠大以翼以承如何中道車折其輪

僅歷一州莫覩厥成嗚呼哀哉某之於兄少長於親
論文講藝豈無友生雪川之別慘焉酸辛視兄之容
澁而不榮酒酣諄復願言愛身少屏剛劑以致和平
孰期一疾竟以此傾嗚呼哀哉于今幾年遠寓雪濱
鴻鴈莫聯每傷予心矧茲永訣痛復可任念當挈歸
以近榆粉乃聞治命旅葬是云嗚呼哀哉遺字見屬
奉之涕零將絕泚筆又何剛明嗚呼哀哉屬拘印紱
奔走不能向風長號薄奠是陳猶子幼弱念言惻惻

敢不扶持兄言是遵尚惟英爽其或來歆嗚呼哀哉
尚享

祭經幹八兄文

嗟哉吾兄生也多屯惟生之難宜永厥齡胡亦嗇之
而止於斯命也不齊其孰為之乙酉之夏過我湘濱
撫我苦塊話言諄諄為我久留久則不忍舟中之別
有淚如隕我觀吾兄齒髮未衰願言愛身相逢有時
兄復一笑子言甚真我健且武當復南征側聞還家

有以自娛醜酒擊鮮賓筵則都謂當婆娑畢此晚歲
豈期訃來駭痛曷已邈在萬里走哭無從寄此一觴
酌西南風嗚呼哀哉尚享

祭奉議兄文

陳了翁

維宣和元年歲次己亥七月壬申朔初三日丁未宣
教郎管勾江州太平觀賜緋魚袋陳某謹以清酌庶
羞之奠致祭于亡兄奉議之靈嗚呼束髮以仕七十
而歸既垂其車心閑無為居有室廬游有園池花蔬

水竹取意設施阡陌臺榭鄉黨交隨笑語繾綣酒肴
燕嬉耳聽聰利視分毫釐齒截大肉足能安馳他人
高年或壯或羸耄悼獨健世罕有之去年九月書來
江湄字畫迫勁未減昔時語不諄復百無可疑喜茲
康寧念不及醫云何奄忽不到期頤嗚呼哀哉生死
隔矣欲撫往棺跡繫異里凡為旅者歲久必歸獨未
得也云胡不悲昔竄合浦還而復流江湖淮海十有
八秋罪大謫薄恩隆命微升沉通塞分定莫違雨榮

霜悴誰能易之首邱志願老益不移越烏擇巢忍離
南枝此心同也將一語誰非我族類難吐肝脾貽書
雖遠尚慰旅思今絕筆矣永無見期祭不躬奠哭不
近惟江流有窮莫窮此悲嗚呼哀哉尚享

祭百一兄文

孫仲益

嗚呼吾兄之歿十有四年中罹多故共畏禍進避盜
徂遷靡有定所炎海之陬又以謫去生還萬里歸視
殯宮久不克葬有愧在中荆溪之陽牛山之阻卜云

其吉安以即路護外有榑甍中為堂既固既安萬世
之藏嗚呼尚享

祭知命弟文

黃魯直

君歿荊州我在萬里歿後四月始聞訃音既無孤惻
恃有兄弟天既喪我君不能年自我哭君頭髮盡白
英風豪氣窘此一棺拊棺長號殆無生意公私之計
身有所縻既難以歸舟車可慮乃得吉卜旅殯僧坊
雖遠至親理則安宴無驚無恐扶將上舉絕慟一觴

君其尚享

祭前室吳氏墳文

孫仲益

恭惟伉儷之好實同貧賤之交天不假年死生契闊
追慟九原之隔貧榮一紀之餘託備藩維追參法從
爰舉終衣之典實資內助之賢象軸錦褰光賁泉壤
英魂如在歆此寵靈嗚呼哀哉尚享

祭章淑人文

孫仲益

嗚呼伉儷十年如屈伸頃夜壑舟移逝無留騁中州

鼎沸共此百罹又於其間有合有離垂老投荒一訣
首路萬里訃聞奄至大故藁莖空山來視定封但見
宿草動搖春風逢時不祥抱恨入地何辜於神而至
于此玉潭之源鬱鬱佳城陬龜筮日我以楫迎湖波
不揚若有神護抱襯呱呱兒啼孺慕嗚呼已矣闕此
新宮敬酌一觴涕淚沾胃嗚呼哀哉尚享

祭亡妻大祥文

葛謙白

嗚呼伉儷之愛頓隔泉壤日月逝矣俄及大祥徹几

中堂遷神家廟聊陳薄奠式燕芳魂號呼不聞有淚
如雨嗚呼哀哉

祭婦吳氏文

吳元及

惟靈挺蘭蕙之質于季英之胄而執箕箒之奉于子
雲素範之門鸞鳳聲巧桃李華芬充婦德之肅雍以
和夫家而舅姑綽以孝聞具此數美是宜康寧壽考
視靈椿以久存風魄雪魂忽先朝露故天道之寧論
雖死生壽夭達人視之猶旦暮而藐耳諸孤惘然無

依曷勝乎蕭蕭之夜月黯黯之愁雲某幸聯瓜葛久
被仁恩聞訃何處抱恨無垠氣欲絕而復續聲已發
而屢吞嗚呼哀哉蘆花雪舞菊蕾金噴况是人情最
難死別那堪秋色偏易銷魂肉在俎兮酒在樽薦生
芻兮淚霑巾尚享

母安康郡太君祭亡女陳氏十娘文 黃魯直

汝嫁十年五歲歸處姑章不呵知我憐汝我徂江南
三年搖搖元豐甲子汝兄還朝道淮沂浴望汝來寧

不聞車音乃聞哭聲汝疾何藥汝殮何服臨絕之情
不能告我哀憐至骨哭淚至泉我創如新于今七年
乳母來歸壻亦繼室昔所抱兒亦既結髮惟汝面目
隔枯木嗚呼是天忍此荼毒久於客土勤我夢思日
月之吉寃宥有期我病在牀不能奮飛寓奠千里文
不及哀尚享

祭女二孺人文

孫仲益

維年月日謹以清酌庶羞致祭于亡女二娘之靈嗚

呼哀哉與汝爲父子三十有一年不謂衰老弃我而
先天乎何辜不卑汝壽一夕遇疾忽奄不救繫女疾
革害於語言託夫與子半辭莫宣天降災殄莫謂汝
酷人誰不死抱恨就木汝夫館我迨十年餘羹藜飯
糗共其有無豈謂亡女而有薄厚庶幾久要定此窮
陋二雛呱呱誰撫誰憐如見汝面在吾目前歸女教
男冀成汝志吾雖老矣猶有兄弟獨念汝夫彊仕之
秋誰復爲汝瞻守一坵先墓之次卜此新宮祖禰相

望我祭其從李冬之月吉日庚午汝其頌歆以封以
樹念汝永歸五內若焚拊之慟絕汝聞不聞嗚呼哀
哉尚享

代壽昌縣君祭張通直文

汪彥章

嗚呼余來媿于君門逮舅姑之輔佐同張氏之艱難
若墳簞之應和憫叔妣之二三及所天之遺禍保齒
髮於桑榆蓋唯君而與我幸似續而免曹各承基不
墮余竊色脂封君通班於禁鎖享甘膳以優游亦吾

家之足賀憶靖國之初齡從子官於浙左承祖餞於
行車起相持於別坐謂聚散之何常涕交頤而疾墮
曾此會之幾時遽春風之五過聞霜露之憂居欲亟
歸而不果喜藥石以護持起沉繇於久卧雖日是
景西庶相從而尚可何卜見之有期忽訃音之來播
恨頻老以無窮氣傷孤而愈挫唯福壽之平生无秋
毫之坎輒為天下之甲門孰人言之敢破天胡嗇於
百年使不終於保荷退忍哭於總幃反惜成於香火

嗟已矣於一觴終莫聞於咳唾嗚呼哀哉尚享

聖宋名賢五百家播芳大全文粹卷百三十九終

聖宋名賢五百家播芳大全文粹卷百四十

祭文

祭舅氏李公擇文

黃魯直

盛德之士神人所依珠玉在淵國有老輝方時才難
公隕于道彼天悠遠莫我控告士喪畏友朝失寶臣
我哭之慟不惟懿親公處貧賤如處休顯溫溫不試
任重道遠內行純明不缺不疵臨民孝慈來歌去思
其在朝廷如圭如璧忠以謀國不沽予直熙寧元祐

言有剛柔公心如一成以好謀十年江湖醉然生色
十年主計鬚髮盡白他日謂我何喪何得我知公心
謀道憂國出牧南陽往撫益都稱責辨嚴笑語即路
天下期公來相本朝奄成大夜終不復朝嗚呼哀哉
我少不天殆欲堙替長我教我實維舅氏四海之內
朋友比肩舅甥相知卒無間然今天喪我舅氏傾覆
誰明我心以血繼哭平生經過為我舉觴沃酒棺前
割我肺腸嗚呼哀哉尚享

祭外舅樊寺丞文

葛謙白

嗚呼宣和山陽公始女女不余陋庸甥館見處浹旬
別公侍親臨安有燁其旆公來自楚欲視其息不憚
羈旅公官蓬池我舟繫渚公為歡迎倒屣延竚濶展
盃盤侑以歌舞龍集甲辰注官銓部十口累公遂閱
寒暑出乘公車入蔭公宇寧勤館人喜侍揮塵虜動
維揚歲在丙午變起倉卒公渡江浦僑寄吾邦始獲
安堵草草茅茨連墻接武履艱踐危更相勞若忽起

越吟莫諧久聚甲寅外姑玉樹埋土我携弱妻一慟
瑩所辱公淹留曲加拊偃前年菰城犀顏再覩勤公
放船來訪郊墅時病耳聰中響翅羽意謂仁人何恙
弗愈遽違我行咽不得語莆陽之官冒陟脩阻歸未
默突丹旄歛舉嗚呼哀哉惟公早齡天授才諧入丞
府寺出貳藩府所臨有聞德洋恩溥矧惟平生陰德
莫數天災告飢輒發我庾為梁干丈不靳囊褚謂當
大耄哀職是補如何弗淑遽沉幽戶嗚呼哀哉我壻
高門歲二十五訃音忽來痛貫心膂道里千神棺莫
撫遣介伸哀殞淚如雨有酒在觴有肴在俎歆此微
誠公其勿吐尚饗

祭外姑蔡宜人文

葛謙白

嗚呼獲壻高門一紀有奇始聯好於山陽繼歛睇於
蓬池同居汴闕連屋荆溪雖所履者有枯有苑而所
遭者有險有夷顧拊偃矜憐之意則一蓋未嘗不曲
盡其慈也去歲夫人臥疴適亦呼醫悵侍疾之莫及

遂永隔於音徽洎聞凶訃携孥亟歸冒修塗之蒸鬱
經川陸之艱危踵門長號第見緇帷嗚呼哀哉今者
遠日告吉墨食令龜屬茲匏繫又不得臨壙而伸其
悲酒脯之奠遣介致之東望腸絕頓涕交揮嗚呼哀
哉尚享

祭外姑恭人文

張欽夫

惟靈生於相家來嬪德門奉饋米藻克謹晨昏如賓
之敬婦道則宜逮夫晚歲有光母儀允矣三德協于

彤史胡不百年永庇孫子憶在柔兆獲拜于堂辰幾
一周有淚淋漓我悲終天靡怙靡恃起尋涓陽痛復
抵此傷哉道遠一慟莫前薄禮將誠靈其鑒然

祭親家文

惟靈之生婦德著兮柔淑且慧忘怨惡兮賢哉主饋
大克助兮敬長恤孤宗姻譽兮旣肥其家而
兮
振振繩繩繁而庶兮宜耆而艾何朝露兮彼蒼蒼者天
而
兮胡其不仁奪之遽兮如晝而夜抑定數兮

伊令仲子予女女兮粵予外孫而許娶兮再世婚姻
嗟莫顧兮追懷感傷曷云喻兮載以清醕敬饌具兮
伊禮之薄盡其愆兮嗚呼靈兮莫予吐兮

祭朱時發親家文

陳了翁

嗚呼昔會靜海于今六年君護喪歸我以竄遷迨隔
三江懼無還期天子仁聖復令我歸離合之時未得
君訃單舸北來猶異復晤白沙之傳初信且疑今知
果矣孰如我悲君老苦學趣一而專富而能貧內無

間言寂默能仁為方外師志者於仁孰得而疵仁則
宜壽胡不期髦天所促延人奚可考君於世味澹乎
其歸苦樂壽夭存歿豈移淮江阻修莫不以時情發
於辭君其監之嗚呼尚享

祭姑夫李提舉文

陳了翁

嗚呼昔我先君愛鍾令女擇所宜從以歸于子子昔
悼亡我方居憂痛在手足涕不可收季妹繼適今能
幾時子既殞矣孰知我悲我非明哲觸禍固宜子亦

放廢一斥不歸窮達死生所遭各異海波則殊水一而已數極而化亦又奚傷君子之道死也不亡尚享

祭妹夫祝天惠文

趙承之

昔我叔父少失其配纍然二女誰恤誰恃光君鞠之蓋猶出已伯長且賢以配君子維時君子好學發憤方少而剛在窮不恤屢舉于鄉而輒不偶布衣儒冠以至白首後生紛紛或登而先昔也納履公而自賢先生皤然志節彌厲奔走四方以至于死嗚呼哀哉

某兄弟幼孤且愚先生教之讀以詩書獲游薦紳則維公賜我圖報之而乃如此嗚呼哀哉想公平生舉白呼盧憶公疇昔慷慨將鬚涕泣陳觴叙訣梓里猶有諸孤敢不終始嗚呼哀哉尚享

祭包氏妹出殯祭文

孫仲益

嗚呼哀哉某政和初與吳氏妹侍先妣太淑人將吾妹歸于同縣之包氏大家勝衣冠者數十百指而失君寢然獨秀蔚為宗廟瑚璉之器後四十年而吳氏

病歿於京師又四年而太淑人感疾而逝中更喪亂
死生契濶而包氏尊章亦已下世獨吾妹克相其夫
兮舅冠女婚持門戶之寄謂當壽兮百年與君子偕
老兮云何一病而遽蛻嗚呼哀哉追數存歿兮閱一
瞬而三紀嗟余歸然獨存兮隻影隨而卧起始結螭
以踐其行兮又窺墓而送之死鬱万感以中集兮溢
兩皆其如洗手足情所鍾兮此身歿而後已蒐揚緇
以來歸兮歆余觴豆之薄祭嗚呼哀哉伏惟尚享

祭李甥文

陳了翁

吾與乃翁俱為竄人我來萬里與鬼為鄰瘴毒之鄉
朝不保夕謂必與汝平生永隔吾衰既久汝方妙年
孰謂汝也而弃我先唯吾二家世接姻眷汝母及汝
吾妹吾倩我取熊堂天寶使之迺翁南流亦豈人為
仲取高弟既得而奪汝性孝友知汝惓惓左右就養
不營其私隨泊湖外五年于茲不得汝書今兩歲矣
形阻心親不隔萬里信自北來吾心登然云何不淑

乃以訃傳我初論事即捐其生杜門待盡符到奉行
家如風舸任其浮沉執不能保豈无愛心死者歸也
汝既歸矣吾雖未歸俟命而已汝生不幸汝死不亡
千載之後聞者歎傷嗚呼哀哉尚享

祭張李清文

呂伯恭

嗚呼游於師友之間歛然自持豈其無人舍業而歸
耳目改前移養樂奪不失其初心者蓋亦寡矣子之
在吾門侃侃和飭執經不怠於是時猶未知其為獨

異也自我不見于今五年有來自西者皆道子於兄
弟无違言於里閭無遺行安常謹禮不受變於俗吾
方幸於得子迨此暇日將過子之廬而子則死矣嗚
呼庠序之籍日增而務實之士不加益一觴之慟豈
獨故舊之情而已哉尚享

祭邢邦傑文

越絕之區學者方興一門孝友舊推諸邢内外交映
韡韡嚶嚶人之可願於此而并猗左提而右挈紛前

導而後承寶霜電於春陽久此樂而莫能喟予感於
傷弓駭弦音於鷓鴣陶近憂其未慙集遐感而相仍
理鏡湖之桂楫踐前諾於歲更訪舊聞於故老采新
益於友明愴獨逢於仲氏同此哀於折肱嗚呼尚享

祭于悅道文

嗚呼自子束書從予遊於明招八年于茲矣每見每
進筆端津津如春木之向榮意其前途蓋未艾也我
來自山而子死聞至折屐失聲猶幸風傳之或誤也

疇昔之夜子語我身名未立予固疑其色不舒亦以
為是適然耳庸詎知一再旬之後乃大出於所憂之
外耶流光悠悠兩川東下命也奈何付此杯酒嗚呼
哀哉尚饗

祭潘子臯文

名場利區爵標執的穉奔耄馳百年一日義路仁宅
道源性淵有能用力一日百年之子之才之識之操
萬里首途遽以病告意長數短獲歎殖豐寸心惘然

持此以終有親未報有弟未立有養未充有志未畢
合是數者屬之吾徒矢口而言言發不渝里門相望
伯仲叔季責以撫存亦孔之易道學之責喬嶽高址
毋或不勝重遺子羞嗚呼哀哉尚享

祭陳耀卿文

呂伯恭

嗚呼菁菁藝圃羣植並區天壽豐悴一本萬殊以子
之年方苞萬敷岷山導江適觀厥初病不復興嘆驚
吾徒游義之義具此俎壺

祭吳晦叔文

張欽夫

嗚呼惟君早登五峰之門即捐進取之習從事義古
今幾二十年思慮益親操履益固而其曉悉人情通
練世事持之以忠信行之以周密益有用之實才而
進學之良資也豈謂一旦止于斯邪某與君論心為
日亦久切磋講究友誼金石訃音來傳泣下莫止嗟
乎任道之艱而同志益落此予之所悲而且憂也官
守所拘未能往哭一奠遣致言不復文嗚呼哀哉尚

享

祭李先生文

朱元晦

道喪千載兩程勃興有的其緒龜山是承龜山之南
道則與俱有覺其徒望門以趨惟時豫章傳得其宗
一簞一瓢凜然高風猗歟先生早自得師身世兩忘
唯道是資精義造約窮深極微凍解冰釋發于天機
乾端坤倪鬼祕神彰風霆之變日月之光愛暨山川
草木昆蟲人倫之正王道之中一以貫之其外無餘

縷析毫分其分則殊體用混負隱顯昭融萬變並酬
浮雲太空仁孝友悌灑落誠明清通和樂展也大成
婆娑邱林世莫我知優哉游哉卒歲以嬉迨其季年
德盛道尊有來樞衣發其蔽昏侯伯聞風擁篲以迎
大本大經是度是程稅駕之初講議有端疾病乘之
鑿窮技殫嗚呼先生而止於斯命之不融誰實尸之
合散屈伸消息滿虛廓然大公與化為徒古今一息
冒計短長物我一身孰為窮通嗟惟聖學不絕如綫

先生得之既厚以全進不獲施退未及傳殉身以歿孰云非天某也小生牛角趨拜恭惟先生實共源派閭閻侃侃斂衽推先冰壺秋月謂公則然施及後人敢渝斯志從游十年誘掖諄至春山朝榮秋堂夜空即事即理無幽不窮相期日深見勵彌切蹇步方休鞭繩已掣安車暑行過我衡門返旆相遭涼秋已分某於此時適有命召問所宜言反覆教詔最後有言吾子勉之凡茲衆理子所自知奉以周旋幸不失墜

歸裝朝嚴訃音夕至失聲長號淚落懸泉何意斯言而訣終天病不舉扶歿不飯舍奔赴後人死有餘憾儀刑永隔卒業无期墜緒茫茫孰知我悲伏哭柩前奉奠以贄不亡者存鑒此誠意

祭王深甫文

王介甫

嗟嗟深甫真棄我而先乎孰謂深甫之壯以死而吾可以長年乎雖吾昔日執子之手歸言子之所為實受命於吾母曰如此人乃與為友吾母知子過於予

初終子成德多吾不如嗚呼天乎既喪吾母又奪吾友雖不即死吾何能久搏骨一慟心摧志朽泣涕為文以薦食酒嗟嗟深甫子尚知否

祭李元叔文

黃魯直

嗚呼元叔之義世不可少赴人急難秋陽皦皦奉親色難慈友諸少家人潔齊門巷灑掃築屋聚書延聘師表青青子佩如魚游沼凡厥富室乾沒紛擾君常晏然萬鍾忽抄壽母令妻升堂宴笑慈以旨甘歌舞

妹妙里人欣欣皆謂之好攝持季夏舍有鵬鳥屏藥治歸竟夜元曉邑人奔走上下是禱人亦有言蓋棺事了生榮死哀誰謂君天我遷黔戎形影相弔衣我食我歲使交道立焚望山復江繞屬辭羞奠氣結天杪平生不昧尚享馨醪嗚呼哀哉

祭劉凝之文

嗚呼公乎智謀足以御困剛毅足以行可獨清足以軌物自勝足以立我兀者造而歸全諒无地以棲禍

方燕及於來仍閱門戶之嵯峨忽歇俗而去仙違白
日而蛻卧亡吾黨之一鑑哀楚之傾侈伊曩時之倦
遊實骯髒而坎坷遂投効於頽尾置嬾息於寒餓來
胥䟽於江湖訖有屋於蝥筮執盈虛以化物取衆弃
而致夥間江曠之有秋上橘柚之歲課開亭觀之百
楹孳綠竹之萬个裏餘及之不試故優裕於菑播據
几杖以仿佯樂知識之來過味龐公之幽禪觀有物
於石火歲三會於湑灘訖初志其不挫維歐陽之文

章發高唱而無和配公名而成三何巧舌之能破齒
髮踈而戀嫪坐衰氣而不果載銘旌而來歸遺稚子
以危貨彼聞公之清風亦何面以成唾初不肖之及
門輩諸生之孩孺公慈祥而豈弟獲聞教而侍坐歛
歲晚而升堂見虞主而泪墮湛樽酒其儻嘗列羣悲
於楚些嗚呼尚享

祭李彥深文

黃魯直

嗚呼彥深葦路泥塗賢於駟馬之駕席門風雨安取

數仞之堂體孤貉之溫而不耻緼袍壞絮知膏梁之
味而不厭脫粟寒漿終一世而阨窮內不疚其何傷
維相知之不早始傾蓋於汝陽披蓁蕞之瑣碎見紫
蘭之孤芳沉深而敏學易簡而庭方鄰非仁而不覲
粟非義而不嘗遇人情而難堪旣摧折而愈剛號饑
寒之蒹屋仰歸鴻之南翔擁群書而寤嘆擅榮觀於
文章論若人之豈弟謂百歲而康疆忽靜寐而不覺
問歸來兮未央去親戚與朋友即萬鬼而為鄉嗚呼

虞氏之不為政久矣士不厭於糟糠載固窮以軌世
魯人至今傳其惠康身與螻蟻共盡名與日月爭光
我觀古而視今信吾友之不亡所以發書而掩涕不
忍癡孤與蚤孀婦弱女而教男定子宅于南山之崗
有謝公之知子固特達於圭璋在吾儕之可力尚終
始而就將哀歲月之徂秋悲風號於土囊託千里而
羞莫肴具潔而酒香思曩時之笑語同飲食之淋浪
列檮蒲之花燭呼五白而繞牀儻神理之不昧以斯

文而舉觴嗚呼哀哉尚享

祭鄭鯁之文

陳了翁

嗚呼鯁之冥冥鴻也簞瓢自足藐鼎鍾也冝止則止
良其躬也有物有常家雍雍也彼臧彼否默爾容也
孰喜孰怒寂乎中也盥而不薦志在顯也射已之鵠
審其固也弃彼所爭不與同也包攝無間介而通也
其積弥高不自穹也其割彌利飽磨礪也志道則士
耕則農也齋戒其年願普豐也洛口之別再星終也

我禦魑魅不吾攻也衆侮而逝來益恭也孰不彼信
獨由衷也大勢爰烈堅不鎔也派流分漫趨必東也
詩來了齋手自封也馨積吾筭氣蘭芎也讀而味之
餒可充也歲寒不易挺挺松也還里胥樂願未從也
故不少延弃我終也隱几坐逝歿不窮也不器其有
獲豈空也俗暵迺迹憫不逢也卒以歲計孰汙隆也
人生流寓猶波蓬也谷无停響隨彼闕也衆耳牘牘
聽獨聰也問奚聞乎示以聾也生死不貳歸其宮也

儒耶佛耶一視融也嗚呼尚享

祭梅卿叔文

黃泰之

惟靈慷慨正直得於天資莊靜夷雅夙出流輩種學
積文優游乎聖賢之域砥節礪行周旋乎規矩之內
奉親長著孝友之風飭子弟有義方之誨繫厥德之
純備宜享齡之未艾胡六旬而甫及乃一疾而遽蛻
莫能詰造化於小兒殆將任勞逸於大塊某等怡愉
骨肉繾綣愛情茶甌酒盞日聚時會感佳節之過眼

悵音容之何在慘黃花而无色對西風而一酌嗟物
是以人非覺肝裂而腸碎飲此恨於終天想英靈之
不昧嗚呼尚享

祭徐宗卿文

呂伯恭

嗚呼子於輩流號為端靖見我於嚴厥問日振加之
數年道戰將勝何辜於天乃中絕命遣此一厄千載
之鑒尚享

祭詹子齊

嗚呼入事父兄出事公卿視之至近居然高深昔在
講席聽者如林子于是時奉持兢兢既踐子職亦祇
官箴地中生木順德日升天則奪之疾疢相乘涉春
夏秋泯不呻吟胡不呻吟恐憂其親惜哉此士哀哉
此心風雨寒飈餽奠之情嗚呼尚享

祭蔣從道文

嗚呼弁服之褫然絃歌之鏘然子游其間兮呻吟挾
策而纍然賈區之囂然怪珍之錯然子廬其間兮講

誦下帷而嗒然貌甚癯兮志則堅力既憊兮道方澶
出門軸折兮淪晝景於虞淵大塊噫兮化機旋森惟
薄兮紛糾纏天壽不惑兮奚怨猗朋遊兮昔暉聯
交一臂兮失九泉跽傳觴兮江之孺暮山合兮橫蒼
煙嗚呼尚享

聖宋名賢五百家播芳大全文粹卷百四十終

